



名山勝槩記

浙江四下



ル 5
160
18



弁山記

明 慎蒙

萬曆二年歲三月自府城出北門至弁山行二里許
 至山麓極目而視則南之道場與東西諸山皆呈一
 覽而菜畦麥隴環綠於平疇曠野之間殊為恬目繼
 而仰視則太湖諸石巍然獨隆乃洞石也至洞口則
 洞南一石卓立如人形而刻次東坡韻詩一首又一
 石北向偃僂而雄踞背刻黃龍洞三大書筆畫遒勁
 已沒其姓名矣自右繞而東皆巨石如人力壘成而

弁山記



皆、有、隙、縫、可、通、一、線、殆、是、天、造、洞、之、北、有、石、壁、方、而、
且、大、高、可、數、仞、南、一、石、略、加、粘、連、其、勢、若、欲、飛、墮、者、
石、上、草、木、森、然、參、差、掩、映、不、知、何、所、托、而、生、也、石、壁、
下、一、石、聯、屬、橫、生、突、出、如、今、之、增、塑、佛、座、下、有、門、北、
向、方、而、且、整、伺、之、不、知、其、底、俯、視、洞、中、令、人、心、悸、目、
眩、真、爲、不、測、其、石、之、植、立、於、洞、內、者、稜、角、分、明、狀、如、
鋸、板、又、一、石、形、圓、似、竹、僅、得、其、半、若、受、斧、鑿、四、週、皆、
有、階、級、可、攀、緣、而、下、巉、岩、刻、削、奇、麗、異、常、曾、有、人、緣、
組、而、下、計、二、十、五、丈、始、至、底、底、石、皆、五、色、成、文、南、有、

一、小、洞、洞、口、以、泥、封、聽、之、有、聲、如、吼、驚、惶、而、出、俗、傳、
有、龍、潛、伏、且、通、太、湖、名、爲、龍、宮、不、誣、也、夫、洞、之、深、入、
而、奇、巧、者、往、往、有、之、此、則、直、下、而、奇、麗、雖、志、所、記、載、
尤、爲、罕、見、真、武、殿、復、有、小、石、壁、高、一、丈、有、奇、壁、下、小、
池、名、曰、小、龍、潭、及、至、絕、頂、坐、間、水、亭、則、太、湖、之、一、碧、
萬、頃、可、俯、視、不、遠、咫、尺、飛、帆、搖、曳、宛、如、一、葉、以、及、東、
西、洞、庭、與、夫、小、雷、大、雷、縹、緲、七、十、二、峰、如、在、鏡、中、因、
與、游、客、張、蓋、草、坐、命、酒、籍、石、袖、拂、烟、霞、喜、驚、驚、鶩、悉、
出、樽、俎、之、下、興、盡、方、返、是、日、也、偶、而、天、朗、氣、清、風、浪、

恬靜得盡其勝如此且山下楊梅樹以數萬計青翠
滿林不減閩之荔枝自是沃壤又亦奇觀也是洞爲
山主而景之列於上下者適以增其美矣昔夫湖人
皆知道場之爲最勝而不知弁之龍洞勝而且奇予
故記之以闡其幽

遊道場山記

明 都穆

予至吳興之三日郡太守同年呂君文郁招予爲道
場之遊同遊者前四川叅議郡人王君肅之亦同年
也舟出郡南門三里舍舟入峴山寺登藏經閣啜茗
出西行卽抵峴山山本名顯其曰峴者避唐諱也上
有石坡陀積流深石歲久窪然儼如尊形唐別駕李
適之嘗築亭其上名曰窪尊今廢顏魯公刺州日與
客陸羽吳筠及詩僧皎然輩同遊有石尊聯句蘇文

忠公守郡亦有登峴山亭詩呂君謂予曰僧房有竹
共往觀焉已而飲浮碧亭亭據碧浪湖之勝其左下
篁草蒙翳予命僧剪除之湖之全體始呈亭後有碑
乃予友劉元瑞所作亭記汎碧浪湖夾岸之山遠近
起伏蒼翠欲滴而湖水如玉每風生浪湧色尤可愛
昔之人稱吳興山水清遠爲天下第一殆指此耶南
行二里經浮玉山郡之山有兩浮玉其一在孝豐縣
東南十五里名大浮玉此則小浮玉也山特一巨石
趙子昂謂其不以水之盈縮而爲低昂時值梅雨石

幾沒其頂予笑謂其二君曰浮玉今不浮矣又七里
抵道場浜肩輿西行里許卽道場山也上山六百步
經嘯月亭故址又上四百餘步有老屋三楹榜曰伏
虎道場洪武初郡太守襄陽楚岳筆也蓋此山自昔
多虎郡志謂唐有僧如訥者過山中坐盤石上虎伏
其側三宿不去訥遂結菴居之人因名其處曰伏虎
崖楚公之題榜者此也西北而上百十二步有金剛
殿折而北經萬佛閣閣左右鐘鼓樓僅存其址度石
梁其下爲放生池登釋迦佛殿東北曰一勺泉北二

池曰萬工曰瑤席瑤席云者取蘇文忠詩屋底清池
照瑤席語也南上幾二百步經華光樓其西卽所謂
伏虎崖百三十步至仰高亭又上至息肩亭小憩久
之自此至望湖亭太湖在目群峰環之亦登臨之作
處也又上百步有華光殿其後閣雄據山顛惜已破
弊予問僧閣奚名僧云此華光閣也予曰山之樓殿
旣名華光不應此名復同欲呂君易之再詢之人則
云閣名雲峰此亦可見僧之愚矣遂相與一笑閣之
東有浮屠七成成化間燬於雷火今唯存其中之石

忽陰雲四興雨隨至小酌僧室雨霽移席望湖亭痛
飲下山將半予題名石上回至南門民舍已張燈矣

照山記

明 徐貫

成化己亥春二月予與伯兄廷傑一日散步家門外
 指照山言曰此山發跡岩堯中頗深遠聞有所謂寨
 基尖者昔人曾避亂焉終日在目睫間未嘗一遊况
 遠者邪乃命姪惟善惟清約同遊之士於三月望日
 遊焉是日雨不克如約越四月三日山雨初霽烟消
 日出時方在辰携從者出門乃遇錢氏子貢予拉之
 欣然前驅至照山下涉焉有泉自崖飛下作瀑布聲

登田塢口旁有泉出石間叢篠蒙其上惟聞其聲淙淙然沿澗行半里許有泉跌蹠而下高丈許諸遊士至此皆曰足力倦矣仰視絕頂未及十一益憚登陟惟惟善欲強之行咸有難色乃辭歸予五人者且行且坐惟吾兄舉步如飛沿澗石道嶮峻側足而上傍有泉高數十丈飛空而下其色如練曰龍門山龍門而北有山橫峙於左中有田四五段約畝許又轉而稍西行數百步見二三婦女在叢薄間怪而問之荅曰採茶又行數百步有高姓名宗義者刈草爲畚田

其乃問其徑之所由又轉而稍東至鷓鴣頸則山勢益峻無住足之所兩旁壁立中惟一鳥道以左右手攀緣樹石逡巡而上有稍平處則坐坐輒復起力而行至其上有平處東南可二丈許西北徑丈餘皆曰此卽寨基予雖疑其非是然已稍倦乃與惟善惟清皆憇息焉予兄又臨北山之絕頂而下東望則東山崖魚口峰西望則蛟原佳溪南則威平富置雲頭北則柘源橫水余葉諸山綿綿延延或起或伏簇若在咫尺間其他溪口高洲南塘又皆舉足之下矣水勢

曲折盤旋如帶一一皆可盡已渴欲飲去茶山已遠
無可採者乃摘烏藥樹葉瀹水啜之酒三行復循山
頂東山行有石脊過脉處其北壁立數百仞惟善踞
地瞰之曰適所坐處乃寨基右臂爾彼稍南而高山
者中可五丈許四面皆壁立此則寨基也予回視果
然欲再往則足力不任矣乃相與憇息於照山之上
有坪可二三丈許下視蜀阜諸山如培塿人家如蟻
封雞犬之聲隱隱可聞酒五行沿山沿金字峰頂又
東行過二峰頂至前壠卽予所卜壽藏處也又數酌

而歸日已在未矣予觀其山自徽歙至西山之南降
勢結頂分爲二支一支南入江村一支東至前壠其
至前壠者中至照山又結頂作華蓋形分作二小支
逆上一支至前壠而止一支至畢墩復起一員峰折
而北橫繞其前其他諸山又皆蜿蜒而來如拜如揖
水前後環繞周匝始去

沈琮遠遊陳山記

成化改元乙酉之九月同沈吏部朱郡博及鄉之縉
紳暨韋布士共十有五人集社陳山爲登高之會乃

道松逕躡而上甫及山半已憊于險峻別取山麓坦
道東行僅二里折而南上至石壁下探龍湫湫水泓
瑩澄潔雖大旱不涸掬飲之味極甘美去龍湫四十
餘步大石危峙旁如仰盂形石眼泉出涓涓不絕俗
呼曰洗兒盆由湫至南而上近三百步許至絕頂始
平曠東南則大海水天相涵一目無際直南則明越
諸山如屏障隱隱羅列于百里外東則金山西則秦
駐峰如龍虎騰驤相輔弼也後則二大石相矗高皆
喻二尋又有所謂龍母塚飛來石仙人洞在別峰間

勝國時山前後民居櫛比竹樹鬱繁入國朝海寇竊
發居民內徙茲山遂爲烽埃之所皆童童然矣獻歛
久之

遊爰山記

明 貝瓊

禦兒地四平無山其東北六十里有小山曰爰山山
由爰道人得名爰山之東曰史山陳君仲謀約予遊
爰山今年春三月丁酉天氣澄穆予與仲謀幸無一
事撓乃相謂曰不可以不償所願促治酒肉飲食已
帥陳熊陳魯兩生洎予子翱由大溪北折而東渡陌
越阡至爰山之趾居人四五家皆棘樊荆扉雞犬相
應彷彿桃源中而里之巨族小民有冢在山半冢後

得支徑而上高下稚松萬株環合無路俛首松下偃
僕行而雲氣相盪不啻魚泳波濤中山回路盡有石
嶄然壁立者卽受道人尸解處其巔有小石突怒土
中類迸筍者有盤互類木走長根者方飲酒大醉昏
然欲睡皆踞石而坐松風謾謾吹人衣耳目爲醒欲
過山北陸生來青堂而生以事出其子聞之爲煮茶
來獻乃啜二甌以沃燥吻已而復東其塗漸夷有公
主墓云宋孝宗女葬于此又行至東山則所謂史山
者山視支山稍卑上建神宮祠人至而禱者前後相

屬余亦倦而休焉兩山之中求其竒峰之環拱瀑布
之噴薄如赤城天姥無有也然予意在於一適耳意
之所適亦何異夫赤城天姥哉因觀祠旁古井井深
二仞而泉瑩可鑑疑學仙者洗藥於此或云山僧鑿
石以濟三伏之暍者人獲汲以飲焉山之勝殆盡於
是矣日暮下山路益峭或有雞子石磊磊至不容足
而山陽王氏巨竹千挺參天以非好事者不得造其
所近山又有三湖青停黛蓄與天一色錦鳧往來可
畫從者艤舟以待翺與二生皆登舟仲謀從余徒行

歸翌日戊戌放舟自馬橋南行六七里捨舟而塗至紫微山之陰山楮無草木左右怪石縱橫錯布類駝馬者類虎豹蹲者類羣羊之或寢或訛者細路出石間如縈蛇蹒跚驚而上山顛亦有神官古祠祠之下爲廣福寺寺建於唐時而飛樓湧閣高下向背皆依山勢而成寺僧達公古道延坐半間雲所同坐者曰蘭谷曰天然惜余所知梓南山者不幸而天爲之愴然其東偏小樓曰覽遠遂與古道登樓望海而弱水三萬里之廣宛在其下蓬萊雲氣隱隱接於欄楯也

又西過齋笑巖居中闢燕坐之室納湖光延野色卽所謂天開圖畫者信非夸言也時笑巖沒已久弟子道印具茗飲共讀章孝標詩日卓午返酌於半間雲所醢筍而食肉雖美不能過也與仲謀各賦詩一解兒子翔復成五言長篇以紀其事旣罷下至半山有寺曰慧力蓋晉尚書張延光故第也視廣福尤極壯麗旁像尚書父子而祠之兵變之餘什者不復支蠹者不復易而陶者舍其中搏土爲瓦器然諸浮屠猶守其道不去日於西廡小殿禮古旃檀佛梵唄之聲

雜於螺磬子嘉其信之篤而持之固且嘆吾儒之不能及也其東廡飯僧之堂曰勝功德海宋張卽之所書四字在焉古道導余觀壁間畫龍一驤首躍洪濤中一旣升而反顧恍惚有風雨隨之鱗甲飛動乃葉茂章元統甲戌夏所作距今三十餘年矣其餘兩胡僧亦入妙品歎賞久之寺南有勝果寺者不暇遊且轉而遊東山道遇才公大用洎桑子才沈復東二生因與之俱東山與紫薇夾水對峙相去可三里許石磴猶峻余且賈勇先登古道則不及而後矣山之寺

曰崇福寺寺廢亦久徒見浩劫於荒煙野草間而嘗食其墓顧况讀書臺錢鏐洗劍池走馬塘舉無存者惟仙人葛洪井歷歲不改其泉甚清汲者徃徃得丹砂或投石井中輒有聲如雷又有慈烏泉者在山之東冬夏不竭余以道迂不及觀獨至俱胝喝石岳岳深黑可坐三四人人言舊多合抱大木三伏特如清秋岳前土皆五色兒童拾之以爲玩今大木盡伐棟宇亦撤矣下有農圃數十家屋參差鱗比叢篠灌木交蔭其旁豈亦辟世之人與回登絕頂東望岸海連

山起伏者秦柱山也其北如獅子騰舞者橫山也共
憇東嶽行宮至是而遊者漸稀矣

書罨畫溪

閩中何璧

溪在長興縣西八里古木夾岸叢篠翳其下朱藤蔽
其上如是者十里花時游人競集有罨畫亭宋劉濤
詩竹林深處杜鵑啼兩岸青青草色齊欲識人間真
罨畫朱藤倒影入青溪張西農詩少小江南岸何時
最好行水香荷葉吐春晚鵲鳩鳴落景參差綠芳情
澹蕩生風吹未歸去罨畫小溪平

不溪偶記

武林胡胤嘉

不溪襟帶清邑，每過輒樂其清佳。壬子孟秋，偶得半日閑暇，蕩舟乾元山下，板橋跨曲港，水色如碧，油桑竹映發，使人幽絕。山麓平松萬株，日影穿射，涼風拂襟，暑氣忽滌去。余里而近者，南則超，東則洛，北則乾元，金蛾互峙，爭高，平時登陟，常有怯懾之色。今步山麓，遙在眉睫，氣已凌之矣。樵子復指余坦道，迤邐如蛇盤中亭，再休，下視一邑，不滿萬竈，粉垣如畫，茗水

貫之螺髻之山若跂若倚田苗正綠烟嵐襍起亦領
人意去亭稍陡峻再折而至前架一亭插椽爲藩其
上兩楹中供大士香几潔清不見人影簫聲襍笑語
裊裊自空中出余澄坐久之門榜高士菴蜀人陳侯
效所題高士者漢吳羗宋沈麟士也其銘曰山不在
高有仙則名余再詠徘徊不能去仙字疑不韻易以
人字庶爲雅愜按吳羗漢季人避新莽之亂攜妻子
隨梅福東隱于吳後居烏程之餘不鄉人因名其所
居山爲吳羗山云沈麟士字雲楨武康人家貧織簾

爲養作玄散賦以絕世隱居餘于吳羗山講經教授
從學者數十百人各營屋宇依止其側吳羗山今不
知何地沈約與麟士書云名山旣鄉內所豐晴川亦
坐卧可對意卽今之乾元也余考志無吳羗山疑羗
與差訛故齊書言吳羗山以羗著因以爲號未知羗
前更名何山乾元之名豈在羗前耶又讀吳興掌故
言雲楨有希心日損之句作玄損賦與齊書玄散又
別然玄損不如玄散之合也并記以俟再考

Blank page with vertical lines for text.

吳興志

元 趙孟頫

遊吳興山水清遠圖記

昔人有言吳興山水清遠非夫悠然獨往有會于心者不以爲知言南來之水出天目之陽至城南三里而近滙爲玉湖汪汪且百頃玉湖之上有山童童狀若車蓋者曰車蓋山繇車蓋而西山益高曰道場自此以往奔騰相屬弗可勝圖矣其北小山坦迤曰峴山山多石草木疎瘦如牛毛諸山皆與水際路遠其

吳興志
麓遠望唯見草樹緣之而已。中湖巨石如積坡陀磊
砢葭葦藂焉不以水盈縮爲高卑故曰浮玉浮玉之
南兩小峰參差曰上下釣魚山又南長山曰長超越
湖而東與車蓋對峙者曰上下河口山又東四小山
衡視則散布不屬從視則聯若鱗比曰沈長曰四余
曰蜀山曰烏山又東北曰毗山遠樹微茫中突若覆
釜玉湖之水北流入于城中合茗水于城東北又北
東入于震澤春秋佳日小舟泝流城南衆山環周如
翠玉琢削空浮水上與船低昂洞庭諸山蒼然可見
是其最清遠處耶

遊五亭記

唐 白居易

湖州城東南二百步抵霅溪溪連汀洲洲一名白蘋
梁吳興守柳惲於此賦詩云汀洲採白蘋洲因以名
也去之千百年有名無亭鞠爲荒澤至大曆十一年
顏魯公真卿爲刺史始剪榛導流作八角亭遊息焉
旋屬災滂沼堙臺圯委無隙地至開成三年弘農楊
君爲刺史乃疏四渠濬二池樹三園橫五亭卉木荷
竹舟橋廊室泊遊宴息宿之具靡不備焉觀其架大

溪跨長汀者謂之白蘋亭介二園閱百卉者謂之集
芳亭面廣池目列岫者謂之山光亭翫晨曦者謂之
朝霞亭狎清漣者謂之碧波亭五亭間開萬象迭入
向背俯仰勝無遁形每至汀風溪月花繁鳥啼蓮開
水香賓友集歌吹作舟棹徐動觴詠半酣不知方外
也人間也

湖州勝賞樓記

宋 葉適

凡城邑據江海陂澤之勝皆卽以爲賞蓋物常聚於
此矣吳興三面切太湖涉足稍峻偉浸可几席盡也
然四水會於雲溪鏡波藍浪梁楸動搖而靚粧袷服
之倒影互爲散合衆流放於荷葉浦沉清浮淥鳧鵠
棲止而綺荷文蓼之羅生無有際畔特嶺聯亘巧石
綿絡頗抑湖之重勢而蔽遮其寒風故其人意安而
氣和舸經舫緯艇繪鯨縷細聲窈眇豪唱激越宛轉

一州間隨地而勝。隨勝而賞。無不得所。求具區雖大。不暇觀也。夫豈娛於耳目之狹者。易狗而迪於心志之廣者。難親耶。亦其神靈爽異。所獨鍾。彼雖大而此不小也。國風廢。王道息。柳惲以江南曲名於時。古之采蘋。莕盈而釜熟。薦於大宗。禮至敬也。主於少女。教至行也。惲之采蘋。徒詠而已。其思蕩。其志淫。豈召南本指哉。然而詞人藝士。爭共誇述。郡之勝賞。由是而始。敞堂奧。館益盛於今。太守趙君旣新白蘋亭。復樓於側。其言曰。清風水遁。碧瀾山隱。兼之者斯樓也。力

能見湖而不爲者。民方與我游於麗密之內。我不敢與民縱於青冥之外也。雖然以道講民。見湖可哉。白居易論謝柳樂山水。多高情。不聞善政。按史惲守吳興前後十年。其政清靜。吏民所懷。病去而乞留。千餘人。居易偶不詳也。政在平平。在久。加以不倦。瘠土可使沃。窮閭可使富。况蒲魚豐。衍明山媚水。素稱勝絕乎。君初至。損稅直。增學廩。親不葬。女不嫁。廢疾無醫。死無歛棺。皆助之。恐不及。可謂有志矣。惜其暫不得久。近惠而未及遠利也。故錄以次。惲君名希蒼。字漢

英嘉定十五年三月

吳興溪亭記

唐 權德輿

溪亭者何在吳興東部主人許氏所由作也亭製約而雅溪流安以清是二者相爲用而主人盡有之其智可知也夸目參心者或大其開闔文其節稅儉士耻之絕世離俗者或梯構巖巘紉結蘿薜世教鄙之曷若此亭與人寰不相遠而勝境自至青蒼在目潺湲激砌晴烟蔭嵐明晦萬狀鷗飛魚遊不驚不喞時時歸雲來冒茅洞許氏方岸鵬冠支筇竹目送溪鳥

吳興溪亭記
口吟招隱則神機自生利欲自薄百骸六藏之內累
無自而入焉有田二頃傳于庭下鎡基之功出于僮
指每露蟬一聲秋稼成實倚杖眺遠不覺日暮歲食
之美則以給樽中方其引滿陶然心與境冥則是非
得喪相與奔北之不暇又何可滑於胸中噫夫舉世
徇物以失性而不能自適且繆戾於動靜之理君之
動也代耕筮仕必於山水之鄉故尉義興贊武康皆
有嘉聞而無秕政其靜也則偃曝於斯亭循分食力
不矯不躁庸詎知今日善閉不爲異時之六來耶予

知之深故因斯亭以廣其詞云

吳興柳惲西亭記

唐 顏真卿

湖州烏程縣南水亭即梁吳興太守柳惲之西亭也
 繚以遠峰浮於清流包括氣象之妙實資游宴之美
 觀夫構宏材披廣榭豁達其外睽眾其中雲軒水閣
 當亭無暑信為仁智之所創制原乎其始則柳吳興
 惲西亭之舊所焉世增崇之不易其地按吳均入亭
 記云惲為郡起西亭毗山二亭悉有詩今處士陳羽
 圖記云西亭城西南二里烏程縣南六十步跨茗溪

爲之昔柳惲文暢再典吳興以天監十六年正月所起以其在吳興郡理西故名焉文暢嘗與郡主簿吳均同賦西亭五韻之作由是此亭勝事彌著間歲頗爲州僚處而有之日月滋深室宇將壞而文人嘉客不得極情于茲憤憤悱悱者久矣邑宰李清請而脩之以撫衆君子之意役不煩費財有羨餘人莫之知而斯美具也清皇家子名公之胤忠肅明懿以將其身清簡仁惠以成其政弦歌二歲而流庸復者六百餘室廢田墾者三百頃浮客臻湊迨乎二千種菽畜

養貧於數萬官路有刻石之埃吏厨有食錢之資敦本經久率皆如是畧舉數者其餘可知矣豈必夜魚春躍而後見稱哉於戲以清之地高且才而勵精於政事何患雲霄之不致乎清之筮仕也兩參雋乂之列再移仙尉之任毗贊於蜀邑子男於吳興多爲廉使盛府之所辟薦所知學詩之訓間緝之心施之於政不得不然也縣稱繁舊矣今詔升爲望清當受代而邑人已軫去思之悲白府願留者屢矣真卿重違耆老之請啓於十連優詔以旌清之美也某不佞忝

吳興郡志卷之八
當分憂共理之寄人安俗阜固有所歸雖無魯臣掣
肘之慮豈盡子言用力之術由此論之則水堂之功
乃餘力也夫知邑莫若州知宰莫若守知而不言無
乃過乎今此記述以備其事懼不宣美豈徒媿詞而
已哉大曆一紀之首夏也

書白蘋亭

唐 李德裕

吳興郡南白蘋亭有重臺芙蓉本生於長城章后舊
居之側移植蘋洲至今滋茂余頃歲徙根於金陵桂
亭奇秀芬芳非世間之物因爲此賦以代美人託意
焉

柳吳興暉詩曰汀洲采白蘋日暮江南春洞庭有
歸客瀟湘逢故人

書聚芳亭

吳郡王世貞

吳興山水號清遠。其在唐宋時以園亭之勝埒宛洛。自余游吳興求其跡而不可得。蓋內郭崇而闌闔外郭夷而桑麻之區。其俗之朴茂纖嗇固然。余嘗戲謂山可瀦。湖可陵。則亦治而田舍之矣。間以故典考所謂亭館以披翫卉木者。唐開成中楊刺史漢公爲園於白蘋洲而亭之曰集芳。見白少傅樂天記。宋牟端明子才爲園於郡宦而亭之曰芳菲。見周弁楊公謹

襟識至元時閔廷舉介甫爲園於近郊而亭之曰聚
芳見陳進士遇記三亭大抵命意相埒其故址隨後
先廢而獨介甫能合一時之知詞翰者爲之記若詩
其七世孫少保莊懿公又能求故李文正公爲之顏
其端而志其殿以謀不朽亦可謂能世業也已。

遊石林記

末 葉夢得

李文饒平泉草木記以吾平泉一草一木與人者非
吾子孫也歐陽永叔嘗笑之余謂文饒之惑何止平
泉草木而已哉後讀五代史至張全義監軍與其孫
延古爭醒酒石全義殺之延古可謂克家之子矣然
以違監軍守祖戒因之以殺身一石亦何足言使文
饒而先悟此豈直無以累後人亦當自免其身矣好
石良是一癖古今文士每見於詩詠者未必真好也

其好者正自不能解。余紹聖間春官下第靈壁縣。世以爲出奇石。余時病卧舟中。聞茶肆多有求售。公私未之貴。人亦不甚重。亟得其一。長四尺許。價當八百。取之以歸。探所有。僅得七白金。假之同舍。而不覺病頓愈。夜抱之以眠。知予之好石。不特其言自行。此壑剝剔崖洞。與藏於土中者。愈得愈奇。今崖洞殆十餘處。而奇石林立左右。不可以數計。心猶愛之不已。豈非余之癖哉。賴晚粗知道。文饒之病。則無復有。客欲得者。皆聽其自取。以去。未嘗較。嘗戲謂兒輩。此不特

吾無所累。汝亦可以免矣。天下事何嘗不類爾。每以文饒之言觀之。世間安得更有一物也。

石林山堂記

宋 葉夢得

孔子言仁者靜智者動吾觀自古功名之士類皆好動不但興作事業雖起居語嘿之間亦不能自已王荆公平生不喜坐非睡即行居鍾山每飯已必跨驢一至山中或西菴或定林或中道捨驢徧過野人家亦或未至山復還然要必須出未嘗輟也作字說時用意良苦常置石蓮百許枚案上咀嚙以運其思遇盡未及益即嚙其指至流血不覺世傳公初生家人

見有獮入其產室有頃生公故小字獮郎嘗以問蔡元度曰有之物理殆不可曉蘇子瞻性亦然初謫黃州布衣芒屨出入阡陌多挾彈擊江水與客爲娛每數日必一泛舟江上聽其所往乘輿或入旁郡界經旬不返爲守者極病之晚貶嶺外無一日不遊山晁以道常爲余言頃爲宿州教授會公出守錢塘夜過之入其書室見壁間多張古名畫愛其鍾隱雪鴈欲爲題字而掛適高不能及因重二卓以上忽失脚墜地大笑二人皆天下偉人蓋出於智者當爾吾素頽

墜固非二公之比自得此山樂其泉石欲爲藏書之所且携數僕夫荷鍤持畚平夷澗谷搜剔崖竇雖風雨不避旁勸皆以爲甚勞而余實未嘗倦始其役於物耶新居將成頗亦自警夫仁智性之成德由是以入聖雖動其何傷其必有以養之而後不至於弊因榜其廳事東西兩齋曰近仁曰近智而廳曰樂壽非曰能之蓋雖老猶將學焉又以戒爲子孫者也

湖州石林記

宋 范成大

石湖居士以乾道壬辰冬發吳郡帥廣西行十日至
湖州將遊北山石林入山松桂深幽絕無塵事過大
嶺乃至石林則棟宇多傾頽惟正堂無恙堂正面卞
山之高峰層巒空翠照衣袂畧似上天竺白雲堂所
見而加雄尊自堂西過二小亭佳石錯立道周至西
崖石益竒且多有小堂曰承詔葉公自歸守先隴經
始此堂後以天官召還受命于此因以爲名焉其旁

清州石林記
登高有羅漢崖石詭皆嵌空裝綴巧過鐫刻自西崖
回步至東崖石之高壯礪砢又西過崖小亭亦頽矣
葉公好石盡力剔山骨森然發露若林而開徑於石
間亦有自它所移徙置道傍以補闕空者方公著書
釋經於堂上四方學士聞風仰之如璇璣景星語石
林所在又如仙都道山欲至不可得蓋棺未幾而其
家已不能守或謂此地離人太遠岑蔚荒虛非大官
部曲衆多者難久處又云公沒後山鬼捨攘暮夜與
人錯行婦子不能安室故諸郎去之云出石林飯旌

善寺葉氏墳祠也雪川有兩玲瓏山石林爲大玲瓏
又有小玲瓏在長興縣界路口聞其尤勝石林遂過
之小玲瓏今屬之沈氏此山石色微黃而更奇古一
丘悉空中洞穴千數皆傍相通貫故名玲瓏泉聲瀉
三磴中窈如深谷前小池石如牛馬虺隤其中池後
山屏上洗出之石巖積嵌崖巧怪萬狀缺罅清泉泓
泓叢桂覆其上亭館旣無人居亦漸荒廢雪川特無
好事能捐厚貲買之沈氏雖不得山亦足以豪矣玲
瓏山杜牧之所遊卽石林是以小玲瓏脫出而加勝

由沈家步登舟回至城下一鼓後矣

吳興園林記

宋周密

吳興山水清遠昇平日士大夫多居之其俊秀安僖王府第在焉尤爲盛觀麓中二溪橫貫此天下之所無故好事者多園池之勝倪文節經鉏堂雜誌嘗紀當時園圃之盛余生晚不及盡見而所見者亦有出於文節之後今撫城之內外常所經遊者列於後亦可想像作夢也

南沈尚書園

吳興園林記

沈德和尚書園依南城近百餘畝果樹甚多林檎尤盛內有聚芝堂藏書堂前鑿大池幾十畝中有小山謂之蓬萊池南豎太湖三大石各高數丈秀潤奇峭有名於時其後賈師憲欲得之募力夫數百人以大木構大架懸巨絙縋城而出載以連舫涉溪絕江致之越第凡僨數夫其後賈敗官斥賣其家諸物獨此石臥泥沙中適王子才好之請買于官募工移植其費不貲未幾有指爲盜賣者省府追逮半歲所費十倍於石遂復昇還之可謂心妖矣

北沈尚書園

沈賓王尚書園正依城北奉勝門外城號北村葉水心作記園中鑿五池三面皆水極有野意後又名之心曰自足有靈壽書院怡老堂溪山亭對湖臺盡見太湖諸山水心嘗評天下山水之美而吳興特爲第一誠非過許也

章叅政嘉林園

外祖文莊公居城南後有地數十畝元有潛溪閣昔沈晦崑清臣故園也有嘉林堂懷蘇書院相傳坡翁

步與...
作守多游于此城之外別業可二頃桑林果樹甚盛
濠濮橫截車馬至者數返復有城南書院然其地本
郡志之南園廢出售于民與李寶謨者各得其半李
氏者後歸牟存齋

牟端明園

本郡志南園後歸李寶謨其後又歸牟存齋園中有
碩果軒大梨一元祐學堂芳菲二亭茶蘼雙杏亭浮舫
齋岷峨一畝宮宅前枕大溪曰南漪小隱

趙府北園

舊爲安僖故物後歸趙德勤觀文其子春谷文曜葺
而居之東浦書院桃花流水薰風池閣東風第一梅
等亭正依臨湖門之內後依城城上一眺盡見具區
之勝

丁氏園

丁總領園在奉勝門內後依城前臨溪蓋萬元亨之
南園楊氏之水雲鄉合二園而爲一後有假山及砌
臺春時縱郡人遊樂郡守每歲勸農還必於此艤舟
宴焉

蓮花庄

在月河之西四面咸水荷花盛開時錦雲百頃亦城中之所無也昔爲莫氏產今爲趙氏

趙氏菊坡園

新安郡王之園也昔爲趙氏蓮庄分其半爲之前面大溪爲循堤畫橋蓉柳夾岸數百株照影水中如鋪錦繡其中亭宇甚多中島植菊至百種爲菊坡中甫二卿自命也相望一水則其宅在焉舊爲曾氏極目亭最得觀覽之勝人稱曰八面曾家今名天開圖書

程氏園

程文簡尚書園在城東宅之後依東城水濠有至游堂鷗鷺堂芙蓉徑

丁氏西園

丁葆光之故居在清源門之內前臨茗水築山鑿池號寒崑一時名士洪慶善王元渤俞居易芮國器劉行簡曾天隱諸名士皆有詩臨沼有茅亭或稱爲丁家菴

倪氏園

倪文節尚書所居月河卽其處爲園池蓋四至傍水
易於成趣也

趙氏南園

趙府三園在南城下與其第相連處勢寬閒氣象宏
大後有射圃崇樓之類甚壯

葉氏園

石林右丞相族孫溥號克齋者所創在城之東多竹
石之勝

李氏南園

李鳳山叅政本蜀人後居雪因創此爲游遨之地中
有傑閣曰懷岷穆陵御書也

王氏園

王子壽使君家於所居之中規模雖小然回折可喜
有南山堂臨流有三角亭茗雪二水之所匯茗清雪
濁水行其間畧不相混物理有不可曉者

趙氏園

端肅和王之家後臨顏魯公池依城曲折亂植拒霜
號芙蓉城有善慶堂最勝

趙氏清華園

新安郡王之家後依北城有林田二頃有清華堂前有大池靜深可愛

俞氏園

俞子清侍郎臨湖門所居謂之俞氏自退翁四世皆未及年告老各享高壽晚年有園池之樂蓋吾鄉衣冠之盛事也假山之奇甲於天下

趙氏瑤昇

蘭坡郡城之別業去城既近景物頗幽後有石洞常

萃其家法書刊石爲瑤昇帖

趙氏蘭澤園

園亦近世所葺頗宏大其間規爲墓地作大寺牡丹特盛未幾寺爲有力撤去

趙氏繡谷園

舊爲秀印今屬趙忠惠家一堂據山椒曰雪川圖畫盡見一城之景亦奇觀也

趙氏小隱園

在北山法華寺後有流杯亭引澗泉爲之有古意梅

竹殊勝

趙氏蜃洞

近為趙忠惠所有一洞窅然而深不可測聞昔有蜃居焉

趙氏蘇灣園

菊坡所剏去南關三里而近碧浪湖浮玉山在其前景物殊勝山椒有雄跨亭盡見太湖諸山

畢氏園

畢最遇承宣所葺正依迎禧門城三面皆溪其南則

丘山在焉亦歸之趙忠惠家

倪氏玉湖園

倪文節別墅在峴山之傍取浮玉山碧浪湖合而為名中有藏書樓極有野趣

章氏水竹塢

章農卿北山別業也有水竹之勝

韓氏園

距南關無二里昔屬平原從後歸余家名之曰南郭隱城南讀書堂萬松關太湖三峰各高數十尺當韓

氏全盛時役三百壯夫移致於此

葉氏石林

左丞葉少蘊之故居在卞山之陽萬石環之故名且以自號正堂曰兼山傍曰石林精舍有承詔求志從好等堂及靜樂菴愛日軒躋雲軒碧琳池又有崑居真意知止等亭其隣有朱氏怡雲庵涵空橋玉澗故公復以玉澗名書大抵一徑產楊梅盛夏之際十餘里間朱實離離不減陽中荔枝也此園在雪嶽古今皆沒於蔓草影響不復存矣

黃龍洞

與卞山佑聖宮相隣一穴幽深真蜿蜒之所宅居人於雲氣中每見頭角但歲旱禱之輒應真宗朝金字牌在焉在唐謂之金井洞亦福地名山之一也

玲瓏山

在卞山之陰嵌空竒峻略如錢塘之南屏及靈隱薊林皆竒石也有洞曰歸雲張有謙中篆書于石梁闊三尺許橫繞兩石間名定心石傍有唐杜牧題名云前湖州刺史杜牧大中五年八月八日來及紹興癸

吳興園林記
卯葛曾卿林彥政劉無言莫彥平葉少蘊題名章文
莊公有詩云短鍾長鏡出萬峯鑿開混沌作玲瓏市
朝可見疑驗更向山林巧用工玲瓏山近在一二
近歲沈氏挾剔爲之大率此山十里中間皆奇
石也今亦皆之於空山矣

劉氏園

在此山德本村富民劉思所葺後亦歸之趙忠惠

錢氏園

在毗山去城五里因山爲之崑洞秀奇亦可喜下瞰

太湖手可攬也錢氏所居在焉有堂曰石居

程氏園

文簡公別業也去城數里曰河口藏書數萬卷作樓
貯之

孟氏園

在河口孟無庵第二子旣爲趙忠惠婿居雪遂創業
於此有極高明樓亭宇凡十餘所

孟凡園

領文

文簡公限業少去地幾里曰西口藏書樓其卷計數

野凡園

大廟平河巒山巖凡西風亦無育堂曰平山

遊龍眼潭記

明 董穀

龍眼潭在澱之南二里許天岸山下王道祠之側余為土人三十有四年矣壯事進取蓋嘗觀于錢塘北涉彭城之險旋渦逆湍蛟鼉所宮咸親試之獨茲潭在郭門之外曾未得一營目焉乃乙酉二月望日同前峰少林二禪子登荆湖之颺山指點茲潭相去數里興發浩然歸而語諸徒期以翌日遂將諸生拉李光德為引導春風甚顛午潮怒長粘天陷日奔雷走

音耶潭記
鯨來如崩山去欲縮地石崖林立莫可名狀深者如
室削者如壁廣者如車狹者如帶完者如怒猊伏虎
碎者如斷劍折戟洪濤吐吞萬皺鱗集雖魚貫却立
俯視數丈而浪花仰激洒然著面大浮山去潭可百
五十步趾若積鐵亂流環射如沸湯然草色纖碧雜
樹婆娑對視可枝數葉辨而不能度也悵然久之徒
亂人意前癸未六月有兩巨魚東西來適會於此僅
容過之棹尾激水至於山椒業海者千百夫皆見今
偶憶之光德曰信小浮山在大浮之外相距尋丈其

廣視大浮四之一頽然居乎滄泮之間正西一山去
此如三十里者茫茫於烟雲水氣中不見其麓的然
純黑上平下均如帽屋者上虞縣下蓋山也白塔之
左爲秦駐峰大浮之右爲葫蘆灣綿亘圍繞隱若金
城而澈之形勝盡矣余嘗考水誌有仙人洞在天岸
山之後是日由潭左遵海而東躊躇坡陀捫歷窟宅
至縹岡憇焉南見四明羣峰列岫霞興雲倚旌張笏
拄羅布于數百里外而天吳奮首飛廉矯翼簸盪大
氣渺焉際空竒哉茲遊也已於是光德進曰洞尚遠

龍眼潭記
風惡崖危，往往沙魚變化成虎。叵測請俟他日，遂越嶺而還。所謂王道祠，不知何神，其來甚遠。今惟數楹，巋然篔簹竹中。水志又有弦風亭、美固堂，皆在天岸山下。茲不可考矣。

觀海記

明 方鵬

觀海大觀也。觀海日月之出，又勝也。聞有巨魚焉，不能觀其全體，而得訪其遺跡，又奇也。吾聞海鹽去海甚近，僚友襄陽守徐君子正家焉。姻友王君震發寓焉。地主旣賢，孤興逸發。乃嘉靖丁亥十一月十五日，啓行十七日至止。二君迂于舟次，備言昨有巨魚乘潮而來，潮涸不去。海壩之民望之，若舟卽之，則魚膚綠，無鱗，項有長毫，頸如馬鬣，長可十七丈，廣半之高。

可三丈口之廣半之陷于洳沮不能反側海民操利刃競刳其肉久而覺楚鳴如虎哮衆皆辟易刳之三日乃盡其骨尚在也予更躍然十八日薄暮襄陽具標榼邀予出東門外半里而海在焉震發與門生孫尚文偕至少焉月出於蒼烟白露之間予乃振衣坐石呼酒痛酌眼界空濶胸次如洗遙見秦駐白塔二山隱約波間不能凌虛御風登其絕頂俯瞰萬象爲平生一快事也相與踏歌而返十九日黎明予與尚文潛往解衣盤礴候於古廟黑雲一抹橫亘震方尚

文疑之予曰無傷也日出當自消矣已而果然煦如陽春靜若太古躍金浮緞萬頃一色思得長帆巨艘駕風破浪直抵扶桑探暘谷以攀羲和之馭不尤快哉童子引而稍南觀所謂魚骨則皆爲有力者取去止存鼻柱長可丈餘徘徊久之是遊也信大觀矣勝矣竒矣然不能無感焉昔魚之在大壑意縱體舒雖與海俱存可也率然冥行遂爾失勢以克樵夫漁子之腹可哀也已古之以豪傑自擬者心雄萬夫傲睨一世孰得而侮之一旦迷宦途罹法網幾不能保其

身若太白長流於夜郎。种放見斥於晚節。是皆有以自取也。凡與我同志者亦將有感於斯云。

[Faint bleed-through text from the reverse side of the page, including characters like '文' and '之']

當湖記

歛 潘之恒

當湖縣東陸地有胡僧相曰是當為湖後果陷史君者不知何許人一馬繞東北角而號馬跡盡為墟今祀廟曰白沃民思而報之者也此漢順帝年間事我明成化某年始立縣曰平湖言與湖平也湖稱放生池自陸太宰與繩之先公始詳弁州公記中悠然亭所由名也亭北曰鸚鵡洲今建埕處而弄珠樓辰其北塔當樓之南余以仲冬閏月平旦登樓日出東方

當九溪之南首白沃則最北口也日初出吐半規與水中影合而成壁出水面則爲連環而浮光萬點政如倒影多寶塔亦觀水之最奇也樓雄傑特起週列步廊然湖水盪胸不若塔前亭際爲曠悠然亭皆石柱挺立此中淵邃而澄泓下通海眼有源湧出分東西流歲旱則禱於斯爲近龍之窟宅前案卽爲陳山龍母居之油然沛然其感召神化爾爾旣歷聖塘關訪俞僧密于灌莽山居南出二十里可達乍浦城向從秦駐山眺之以歲暮未暇一臨方朝食忽聞萬馬奔馳聲僧密云此潮鳴也夫錢塘之有激而聲也此非其聲聲者耶作當湖記

記雪川遊賞處

宋 倪思

城內

顏魯公堂

莫氏蓮莊

莫中郎園

魯氏極目

林氏雪堂

楊氏水雲鄉

萬氏南園

鄒氏園

慈感寺

沈尚書園

晦巖園

葉氏園

趙氏北園

俞氏園

向氏園

城外

程氏園

道場山

何山

研山

趙氏玉鑑

趙氏慶源堂

法華山

仁王寺

湖趺亭

荻崗寺

趙氏小隱

思溪寺

西余山

趙氏梅園

弁山觀

石林

黃龍洞

賽玲瓏

小玲瓏

太湖之濱

張氏園

東林

菁山

濮山

德清

長興

武康

凡四十二處若月一遊則日日可度每歲一遊則可
 閱三十年日日遊太頻勞費可厭歲一遊太踈今酌
 其宜每月任一處遊一月之中又擇良辰美景具山
 肴野蔌或邀一兩賓無賓輪携子弟同行庶幾踈頻
 得中至于月夕雪夜暑天遊溪賞荷又不在此也齊
 齋居士書



